

# *Sa Vida de Giovanni Moi*

Giovanni Moi, est nàsciu in Seulu su 25 de gennàrgiu de su 1910 in una famiglia de pastoris. In unu perìudu ci in pagus teniant sa possibilidadi de istudiai, issu si fut postu in conca de s'ighiri is stùdius e difatis si fut pigau su diploma de maistru in su 1938, gràtzias a s'agiudu de totu sa famiglia sua. Iat cumenciau a traballari in su 1939, s'annu ci si fut cojau. Giai de cuss'època teniat ideas antifascistas e difatis si fut acostiau a is idealis de su PCI clandestinu. Is primus inditus de su comunismu ddus iat imparaus gràtzias a unu massaju "intellettuali" torrau de su confinu, e de ex galerajus de bidda sua. Cundividiat is idealis suos antifascistas paris cun unu grupu de istudiantis Seulesus (prus che totu Giacomo e Salvatore Murgia) ci dd'iant agiudau finas a istudiai, ma però fut istau prèidi Carta, unu canònicu seulesu "illuminau" ci treballat in Ogliastra, ci dd'iat fatu aprobiai a s'antifascismu. A pustis de unus cantus mesis ci fut traballendi, sendu chi non teniat sa tèssera de su fàsciu comenti a is àterus maistrus, furint po nci ddu bogai de maistru de scola, ma pròpiu gràtzias a s'interventu de su canònicu Carta no dd'iant licentziau. A su cumènciu de su 1941 dd'iant mutiu a su fronti e fut torrau a bidda sua solu a s'acabbu de sa guerra. De su 1946 si fut postu a fai propaganda po sa Repùbblica, donendu coddu a su schieramentu de manca in sa Costituenti. In is annus '50, eletu consilleri comunali e vice-sìndigu, si fut impegnau meda po su progressu econòmicu e culturali de bidda sua. A s'ora po mori de una lìtera anònima ci dd'acusat de fai propaganda antireligiosa, su proveditorau a is stùdius, dd'iat postu suta inghesta, pedendu fintzas de si nd'andai de Seulu. De annus si fut donau a scrìri poesias in sardu, arregortas poi in s'òpera sua prus importanti a tìtulu "Faulaberu"(fàulas po nai sa beridadi). Sa morali de custus contus est s'uguagliàntzia, sa libertadi, su treballu, sa luta contras a su sfrutamentu, sa cultura comenti strumentu de liberatzioni econòmica e sociali, s'antiratzismu, su pacifismu,



s'anticlericalismu, sa luta contras a sa corrutzioni e a sa màfia. In su 1950 iat pigau parti a su "Premio Cattolica", prèmiu natzionali de poesia dialetali promòvia de sa rivista "Calendario del popolo", bincendu su primu prèmiu cun "Su pitzinnu mutiladu". Tra is giùixis de sa giuria ddoi furint personalidadi comenti a Luigi Russo, Salvatore Quasimodo, Eduardo de Filippo. In su 1953 Giovanni Moi si ndi fut andau a bìviri cun sa familiedda sua a Carbònia, acantu iat fatu su consilleri comunali po su PCI, poi dd'iant mandau a insegnai a Quartu Sant'Aleni e a Casteddu. In cussa data fut intrau a fai parti de medas movimentus culturalis chi furint nascendu in is annus '60, comenti su "Centro di cultura democratica" e su "Centro arti visive". Moi iat decìdiu de scrìri in s'allega de bidda sua, cun s'idea de torrai dignidadi a su campidanesu e difatis fut contràriu a una unificatzioni linguìstica de su sardu. Si donàt de fai, chistionàt e scrìat cun s'idea de impararai; a bortas, custu fatu, podiat donai fastìdiu, ma tocat a nai chi de imparai nci ndi teniat bisòngiu e nci ndi at a essi sempri bisòngiu. Giovanni Moi s'est mortu in Casteddu su 26 de su mesi de onniasanti de su 1996.